

太上天尊說是經已爾時衆聖諸君丈人九老仙都君九炁丈人等悉皆在座咸曰善哉上白天尊如是悟道無不宗仰請問彼諸天世界復有至化不天尊告白自我學道九十一劫因學教化六十二億塵沙世界或分神散體同其生死或化作金剛瑠璃之光或為帝王聖智長老童子或為神瑞仁獸師子白鹿麒麟鳳凰種種方便無所不通但天下衆生罪業深重緣期未至不能變化終歸地獄其中受化之者悉得至道不生三界汝曹既觀道場唯當闡揚道教濟度羣生為發大願普令國主帝王總及諸天地法界一切臣民下至蚩蚩蠕動蚊行之類皆使開悟不入三塗十苦八難死得無極之樂生得法身無量之壽七寶宮殿無物不足汝能如是濟度則為天人之師可不勉也天尊告白是經出世未可隱藏同契相授景福由昌謬傳流俗獲罪招殃於是衆聖稽首悉皆稱善信受奉行

洞玄靈寶諸天世界造化經

太上靈寶天地運度自然妙經

六

道言太上靈寶先天地而生然後有天地數起於一立於三成於五成於七極於九故天去地九萬里積陽氣道陰形列布崐崙為地柱氣上通崐崙者地之中地崐崙直東一億萬六千五百里崐崙直西一億萬六千五百里崐崙直南一億萬六千五百里崐崙直北一億萬六千七百五十里地周遊四匝四億二萬六千二百五十里焉
道言夫日月徑上千里周三千里運行八十一域更迭朦朧眩暎北斗九星二星陰不見相去九萬里以沈澗八十一州八百一十域北斗崐崙嶺上抱崐崙嶺氣運注天下春夏為零露秋冬為霜雪人與天地同也天地八方之外萬物受性皆懷憂苦常傷人民含血蠕動不得自在與天地爭命皆當歸死骸骨消入於地精神飛翔輾轉五道為善上天為惡入湖凡人生時所為善惡精神魂魄隨其罪福唯學道求生達運度極致可以長存復陽九之運

道言人生涉胞胎當經十月日死如大風卒起無期死至無時當與心爭為善勿疑故以經道勸勵學士目所不見耳所不聞瑤琦珍物亦何益於身諸為道者當信經誠守善以死不犯惡而生道不可失德不可違違道失德如兒生無母如魚脫淵若志學輪轉死生如盤在關中混混沌沌故一旦變形易數道成於微長齋誦經為德之根自然玄解運度足于神方之外得禮太上玉京之尊乃作頌曰
我唯年衰時 百病皆當經 水消而火起 災衝解其形 百骸生分離 大劫要當傾 吾故畏是痛 求道願長生 去此塵中累 會彼至寂貞 高行期大乘 自然學道成 輪轉無上德 忘我故不名 靜慮度八難 運道竟何嘗
道言夫生惟人為貴既有其生宜獎而成之而貪財怯惜不肯施散奉事師寶以求昇度執自思惟令身非我身所有財寶亦非我有官爵俸祿為身重累將何益於己身老病死

者皆不能為我却之不能自拔為道厚自文
飾謂生已足譬如陸鳥愛其尾終為射夫之
所得為學者當勤心上契知是皆不隨人魂
神去空為困苦當思拔度之根絕三惡之道
今入三善道一者不老二者不病三者不死
長生度世去厄會遇運得太上之寶乃作頌
曰

自念老病盡 三界之大患 福訖命將終
氣絕入棺擲 冥冥成灰土 魂魄無暫安
吾故畏是故 學道無天殘 攝意存正真
淑心諒可觀 孰成三寶圖 自能伏魔官
故我損身施 志超生死岸 混然既無待
永保億齡歡

道言夫修長生志在昇度求無為之道身超
於塵垢絕跡于羣方者當先知天地運度大
期之數陽九百六之災去厄即安之宜如其
不爾雖自求道終年而希昇騰將復賞其功
夫辛為徒勞也今開示爾劫運之期盈縮之
分俾躬求生以招長命豈但在一軀而已哉
亦將七祖及胎也仙公曰夫學道精研能明

運度陽九百六之會亦必得度世無危傾也
要在長壽久思遠去人事想兼忘然後可
期肉飛之舉如其一毫不盡不可謂水求太
極真人論法言十首

赤書土出治 金玉復為夫 青龍甲申會

奄至誰能知 雖著天水文 實候壬子期

辰中色當變 先待觀胡兒 崐元最其尤

積石次不治 蕭蕭上學士 後天奉天時

福非一朝過 七葉積善基 太平契孟津

樂哉何照怡

玄運金馬末 古月侵神州 陸上既無子

兄弟亦迭遊 河洛子空盡 燕趙成洪流

荆陽柳其次 已刻中徽符 芒子盡十載

東海桑中遊 宜先入福地 八石以鍊軀

柳城即生地 伏龍不為愁 玉筭近世間

桐栢甚易求

丁亥不云遠 八公同會俱 玄生浮紫雲

誨以九靈子 今未負災尤 雷電不可止

出在申酉歲 彌漫留十紀 至于水龍時

仙君乃方起 弓口十八子 高吟相管理

百官森列序 穆穆皆首士 勤心慕松喬

劫盡已度已 平日解帶遊 寸亮寫袿囊

方平記大鳥 當來東南翔 下愚不見事

賢者披神方 郊境沒夏首 太白失度常

雲霧皆變化 魚鱉遊汪洋 一時淪東海

無復起于商 壬午之南嶽 即陰以為陽

揚州可度世 時誦生神章

張氏著鵠鳴 識緯金馬末 反白相中傷

妻衿不解帶 官兵悉竄走 賊疆日凶大

九重雖衣裳 官墻時了壞 荆棘當庭生

王侯沒虜賊 妻婦亡異域 使役無時泰

街賣諒可哀 千載豈復會 末若早學道

宅志霄霧際

修學諸祭酒 治法當今勤 不謹百八十

至時如火煎 近在金氏世 念此當可言

兵力四銜至 一日不可延 然後洪災會

浩哉與天連 行尸無所觀 聖人知信然

先學悟玄京 方寸會名山 欽維之勝地

至道固靈祖 平都迷翰墨 福地諒可往

庚辰卷胡動 壬午有奇賞 先當之福鄉

高詠以自養	萬里望無烟	壬辰未消殃
既平仙君治	八方息羅網	如吾玉斧患
永謝塵中壞	華祿豈足貪	於茲絕冥想
孔生遺明藏	木封若有因	甌山可遊處
九夷拂輕塵	陋廬守空寂	玄默湛冥緣
泉涌不繼本	卯金無傷人	刀曲不覺痛
今世傷爾身		
太和山可詣	鴈門其明真	鹿堂信可貴
和民至壬辰	十八既出治	子來合明真
吳地偏多仙	荆湘最困貧	
柳谷安可親	三倍放勳世	爾乃知苦辛
聖帝既出治	期在壬辰始	明星煥水母
申後留十紀	大鳥東南聚	生血滅門裏
羣鼠緣高木	衆多不可止	女子入官府
雲龍無比擬	愚者謂不然	賢者自方時

凶醜頓除聖君受任於壬辰之年也此太極真人法言十篇神趣妙暢微旨朗空期運之數去就之要可謂詳矣可謂盡矣

道言若能常誦誦與韻則得度洪災於陽九受位任於丁亥約當先長齋靜誦默絕諸累然後求釋解之微旨發清音於脣吻則七祖反胎己身長存經運周而無害受仙而登高妙哉微矣非言所宣子若過之則得上遊王京為聖帝牧民理治

道言傳受之科如吾稱舊典清齋二十四日別齋上金五兩丹地錦百尺以為盟誓受者奉而行之若不依科而妄傳則風刀考罰矣受者辛勤詳慎之哉

太上靈寶天地運度自然妙經

太上洞玄靈寶三元無量壽經 七

爾時

太上道君於三元宮中大會說法眾內有一真人名曰儀可則智力無畏從座而起雅步前跪諮論請談不審一切諸法從何而生既得生已云何觀行而得成道作是語已儼然而立

太上道君撫几微笑曰夫三界諸法皆從道生若欲求道當修觀慧觀慧增益漸至常道常道無邊行亦非一子欲知之當一心聽有數十事不可稱量何謂為數十事一者智慧速身行法不可稱量二者慈悲速身行法不可稱量三者含忍速身行法不可稱量四者行功速身行法不可稱量五者修心速身行法不可稱量六者善業速身行法不可稱量七者精進速身行法不可稱量八者飾身速身行法不可稱量九者違情速身行法不可稱量十者普心速身行法不可稱量是為十種速身行法

太上曰復有十種難口過法不可稱量何等